



Secretario di Estado Sharon Dijksma:

Hulanda por siña di proyectonan di sostenibilidad di Aruba

SECRETARIO di Estado pa Infraestructura y Medio Ambiente, Sharon Dijksma tabata di bishita na Aruba pa reuni cu Minister di Transporte Mike de Meza, pero a probecha pa topa cu Prome Minister Mike Eman, kende tin e Ministerio di Inovacion bou di su encargo.

Esaki ta algo cu Secretario di Estado Dijksma a expresa di ta masha interesa den dje y kier a scucha tur loke Aruba a haci y lo bay haci riba e tereno aki.

Sharon Dijksma a bisa Hulanda, Corsou y Aruba a bin ta discutiendo e asunto di Insel Air (tanto di Aruba como esun di Corsou), ya cu ta importante cu si tin problema cu esaki ta wordo resolvi mas liher posibel.

“Mi ta hopi contento di por a constata cu Prome Minister Eman ta encurasha e tipo di cooperacion pa cual tabata importante pa combersa cu ne y su colega Minister de Meza pa yega na algun palabracion.”

Banda di e asunto di Aviacion Civil y e problema di InselAir, tambe a toca e tema di Acuerdo di Paris, maneho pa cu e clima. “Aruba ta un di e prome islanan Small Island Developing States (SIDS) cu ta traha pa evita e consecuencianan di cambionan climatico.

Mi a traha estrechamente cu Prome Minister Mike Eman durante e preparacion di contenido di e Acuerdo di Paris.

Eynan Prome Minister Eman a firma e acuerdo den nomber di Reino Hulandes. Nos kier duna mas profundidad n’e amistad y cooperacion riba e tema aki.”

Pa loke t’e encuentro mes, Secretario di Estado, Sharon Dijksma a cataloga esaki como uno hopi positivo, durante cual e mandatario Arubiano a duna un splicacion di tur e oportunidadnan cu e ta mira na den proyectonan cu ta CO₂ neutral.

“Tin hopi proyecto bunita den preparacion

of tumando lugar na Aruba. Si nan logra, Hulanda por siña hopi di esaki,” Dijksma a bisa.

Pa loke ta InselAir, esaki a bin dilanti tambe den e combersacion, aunke cu Minister de Meza t’e Minister encarga cu asunto aki, pa cual e mandatario Hulandes a haya hopi placer cu Premier Eman tabata dispuesto pa analisa loke ta importante pa tur partner involvi.

E ta un asunto fastioso, pero mester haci tur cos pa percura pa seguridad den Aviacion Civil y Hulanda ta dispuesto pa duna un man den esaki.